

فريق التفريغ بموقع الطريق إلى الله  
يقدم  
من سلسلة **افتح لي قلبك**  
**حملة اقرأ وارتيق (٢) .. نصره القرآن**  
(باللهجة المصرية)



لفضيلة الشيخ : حازم شومان

رابط المادة : <http://www.way2allah.com/modules.php?name=Khotab&op=Details&khid=31139>

السلام عليكم ورحمة الله وبركاته

الحمد لله حمداً كثيراً طيباً مباركاً فيه غير مكفي ولا مكفور ولا مودع ولا مستغنى عنه ربنا، اللهم أطعمت وسقيت وأغيت وأقنيت وهديت واجتبيت فلك الحمد على ما أعطيت، اللهم صلِّ على محمد وعلى آل محمد كما صليت على إبراهيم وعلى آل إبراهيم إنك حميد مجيد، اللهم بارك على محمد وعلى آل محمد كما باركت على إبراهيم وعلى آل إبراهيم إنك حميد مجيد، ثم أما بعد ...

**مين اللي هينصر القرآن؟**

لا نزال يا إخواني في الحملة حملة "نصرة كتاب الله" حملة " **إِنْ تَنْصُرُوا اللَّهَ يَنْصُرْكُمْ** " محمد: ٧ حملة " **وَأَنَا لَهُ لَحَافِظُونَ** " الحجر: ٩ حملة " **اقرأ وارتيق** " صححه الألباني كل ما هنقرأ أكثر وهنشر القرآن أكثر كل ما هنرتقي والدنيا كلها هنرتقي بإذن الله سبحانه وتعالى.

"حملة كن مع السفارة" كن مع السفارة الكرام البررة، لا نزال يا إخواني في الله بإذن الله سبحانه وتعالى مع الحملة اللي بدأناها إمبارح "حملة الرد على حرق المصحف" حملة الرد على تيري جونس، وكل قسيس، وكل معادي لدين الله سبحانه وتعالى، وكل عدو للقرآن، وكل عدو لكتاب الله، وكل عدو لجبريل وملائكة الله وكل عدو للإسلام، ولكن قبل ما نتكلم على الحملة الليلة، وقبل ما نجدد النشاط على الحملة الليلة، وقبل ما نتكلم في الإنجازات اللي حصلت بفضل ومنة الله، والمشاركات والتطوعات اللي كلها من إكرام ربنا سبحانه وتعالى، قبل ما نتكلم في كل ده، مين اللي هيعمل الحملة؟ مين اللي ممكن يشارك في الحملة؟ مين اللي هينصر القرآن؟ مين اللي علاقته بالقرآن شهر واحد في السنة يفتح المصحف في رمضان، وبعد رمضان يشيل منه التراب في رمضان اللي بعده! مين اللي هينصر القرآن؟

اللي معلقة سلسلة ما شاء الله فيها آية الكرسي وهي متبرجة أصلاً، وماشية متبرجة متعطرة وسافرة، دي اللي هتنصر القرآن؟ مين اللي هينصر القرآن يا إخواني؟ اللي حاطط المصحف في شنطة العربية بيتزئ بيه أو بيتبارك بيه بركة؟ المصحف بركة وخلص! هو ممكن ما قرؤوش بقاله قد إيه وما يعرفش من معانيه قد إيه! مين اللي هينصر القرآن؟ اللي بيقراً القرآن قراءة هي في حد ذاتها قراءة عجيبة! لا هو فاهم القرآن، ولا هو حافظ القرآن، ولا هو يبسعي لفهم القرآن، ولا هو عايش مع معاني القرآن، مين؟ مين اللي هينصر القرآن؟ مين اللي هيشارك في حملة نصره القرآن؟ مين اللي ربنا هينشر الدين ده على إيديه؟ مين اللي ربنا هينصر الدين على إيديه؟ إخواني في الله، اللي هيقف مع الدين وهو متحارب غير اللي هيقف مع الدين وهو منتصر خدوا بالكم دايمًا في آخر سورة الحديد لما

باقرأ قول الله " يَا أَيُّهَا الَّذِينَ آمَنُوا اتَّقُوا اللَّهَ وَآمِنُوا بِرُسُولِهِ يُؤْتِكُمْ كَفْلَيْنِ مِنْ رَحْمَتِهِ وَيَجْعَلْ لَكُمْ نُورًا تَمْشُونَ بِهِ وَيَغْفِرْ لَكُمْ وَاللَّهُ غَفُورٌ رَحِيمٌ " الحديد : ٢٨  
مين اللي هيكفل الدين؟

ربنا بيقولك أنا هاكلك.. إنت في كفالتني، إنتوا في كفالة المَلِكِ سبحانه وتعالى والله أعلم بمراده سبحانه وتعالى، إنتم في كفالتني، هاكلكم بس إنصروا ديني، بس أقفوا مع ديني، اشمعني في سورة الحديد ربنا يعد عباده الصالحين اللي هيقوموا لهذا الدين أنهم في كفالة الله سبحانه وتعالى؟ وإن ربنا هيعطيهم كفلين من رحمته؟  
أول سورة الحديد ربنا يقول إيه " لَا يَسْتَوِي مِنْكُمْ مَنْ أَنْفَقَ مِنْ قَبْلِ الْفَتْحِ وَقَاتَلْ أَوْلِيكَ أَعْظَمُ دَرَجَةً مَنِ الَّذِينَ أَنْفَقُوا مِنْ بَعْدُ وَقَاتَلُوا " الحديد: ١٠ هو اللي وقف مع الدين وهو محارب زي اللي وقف مع الدين وهو مفتوح له؟ هو أبو بكر لما دخل مع النبي عليه الصلاة والسلام الغار زي أي حد بعد فتح مكة لما خرج مع النبي عليه الصلاة والسلام في الجهاد؟ هو أي مال من أي صحابي في فترة الدعوة الجاهلية، ولأ في فترة شعب أبي طالب يعادل التبرع بمال الدنيا كله صدقة على فقراء المسلمين في الخلافة الإسلامية؟ إيه هيساوي إيه؟ وإيه هيعوض إيه؟ يا جماعة اللي يقف مع الدين وهو متحارب ده ربنا قالك " لَا يَسْتَوِي مِنْكُمْ مَنْ أَنْفَقَ مِنْ قَبْلِ الْفَتْحِ " اللي واقف مع الدين وهو متحارب، الدين وهو متحارب محتاج حد يكفله محتاج حد يشيل من وقته ويديله، يشيل من ماله ويديله، يشيل من احتياجاته ويديله، إنما الدين وهو منتصر هو اللي بيكفل الدنيا كلها، اللي هيجي للدين ده بيجي عشان ياخذ، عشان ينتفع في دنياه قبل أصلاً ما ينفع الدين في حاجة من أمور الدين، دلوقت ديننا متحارب، دلوقت ديننا محتاجنا، دلوقت ديننا.. مين اللي يكفل الدين دلوقت؟ مين اللي هيضحي من كل إمكانياته عشان الدين ينتصر.

مين اللي هيرد على حرق المصحف؟ ذلك الحدث اللي أهين فيه المسلمين أجمعين، أيوه بيعبر عن فشلهم زي ما قلنا، زي ما قلنا الراجل اللي حاقد على واحد ومش عارف يعمل له إيه حاول يقتله، وحاول يؤذيه، وحاول يشوه صورته، وحاول يذله، وحاول.. وفشل في كل ده بعد ما ضيَّع عمره، جمع الناس في ميدان ومسك صورة ذلك الرجل وقال شايفين ده، أنا بولِّع فيه أهه بالولاعة؟ دي هزيمة، ده بيعلن إنه ماعرفش يعمل له أي حاجة، بيعلن إن هو كل حقه ده لم يمسه.

### إعلان هزيمة الغرب

حرق المصحف إعلان هزيمة من الغرب، شتم النبي عليه الصلاة والسلام إعلان هزيمة من الغرب، إنهم لا عرفوا يشككوا المسلمين فيه ولا عرفوا يخلّوا المسلمين يسيبوا دينهم، ولا عرفوا يقنعوا الناس إن ذلك ليس من عند الله، لما فشلوا خلاص نشتمه زي ما أي واحد زهقان ومش عارف يعمل حاجة لواحد يقوم شاتم، شاتم يعني إيه؟ يعني أنا ما اقدرتش أعمل لك أي حاجة، عجز، فشل، فشلة.. كل اللي بيعملوه ده إعلان عجز، وإعلان فشل بعد المليارات اللي أنفقوها والمؤسسات التنصيرية والصليبية اللي عملوها، بعد سبع حروب صليبية، والحرب الثامنة الحديثة اللي بدأها بوش بعد الاحتلال، بعد ما خدوا فلسطين، بعد كل ده ماقدروش يعملوا حاجة، ولا يزال المسلمون على عقائدهم، ولا يزال دين الله هو الدين الظاهر في الأرض بإذن الله سبحانه وتعالى، عايزين نقف مع

الدين وهو متحارب ، الدين دلوقت يا جماعة محتاج إن إحنا نكفله بس النتيجة " **يُؤْتِكُمْ كِفْلَيْنِ مِنْ رَحْمَتِهِ** " الحديد: ٢٨ ، إن ربنا هياتيكي كفلين من رحمته، إن ربنا هيوّتيك كفلين من رحمته، إن ربنا هيكفلنا، هنعيش في كفالة الله، القرآن إحنا مش خايفين عليه، القرآن مش في خطر، إحنا اللي في خطر، صلتنا بالله في خطر، استعمال ربنا لينا اللي في خطر " **إِنَّ اللَّهَ لَا يُغَيِّرُ مَا بِقَوْمٍ حَتَّى يُغَيِّرُوا مَا بِأَنْفُسِهِمْ** " الرعد: ١١ حتى يغيروا مش حتى يسيبوا ويطلقوا معاصي لأ.. يغيروا، يتغيروا، الليل بعد ما كله معاصي يبقى كله قيام، النهار بعد ما كان كله معاصي يبقى كله طاعة، ودعوة وعبادة، لما تتغير ساعتها ربنا يغير اللي بيننا، طيب لو ماحصلش التغيير؟ يحصل التبديل، الاستبدال والعياذ بالله ، ربنا يستبدلنا! ربنا يستبدلنا بمن هم خير منا، عشان كده يا إخواني في الله عايزين نستقيظ قال تعالى " **وَإِنَّهُ لَكِتَابٌ عَزِيزٌ \* لَا يَأْتِيهِ الْبَاطِلُ مِنْ بَيْنِ يَدَيْهِ وَلَا مِنْ خَلْفِهِ** " فصلت ٤١ : ٤٢ الباطل عمره ما يقدر ينال من القرآن، وعمره ما يقدر يآثر في القرآن، واللي بيحصل ده إعلان إن بعد ألف وربعمية سنة محاولات تحريف، محاولات تشويه ، ماقدروش يحرفوا حرف منه، ماقدروش ينالوا حرف منه.

### حرقوا ما في السطور ومش قادرين يحرقوا ما في الصدور

إخواني في الله إذا كانوا قد أحرقوا نسخة في السطور فعلينا أن نجعل مليون نسخة في الصدور، لو حرقوا مصحف أو جزء من مصحف في السطور هيعملوا إيه؟ هيحرقوا المصاحف في الصدور؟ هيعملوا إيه؟ هما عجزه مش هيقدرنا هيعملوا حاجة، وإن شاء الله بعد شوية جاين لكم أطفال اللي عندها أربع سنين وهتقرأ من أي مكان؟ البقرة، آل عمران، النساء، بتقرأ في المصحف ثمرة الطريقة أو ثمرة حفظ القرآن اللي إحنا بندعوا إليه، ثمرة حفظ القرآن زي ما إحنا بندعوا دلوقت وعاملين حملة من أجل حرق قلوبهم، هما حرقوا المصحف هنحرق قلوبهم ، هننشر القرآن في كل مكان، وقلت لكم إن دي أول فكرة، أول فكرة ده لسه فيه حاجات إن شاء الله كبيرة وحاجات قوية بإذن الله نعملها بإذن الله ، يعني هي دي البداية بس ، أولها كده إن شاء الله هننشر دور القرآن في كل مكان سواء تحفيظ بطريقة نور البيان أو غيرها، طريقة نور البيان ما هي إلا طريقة بتعلم.. يعني عاملة زي الميكروفون كده اللي متركب دلوقت في البدلة دي، الميكروفون يعني حاجة بتسهّل من وصول الصوت ليس أكثر، حاجة بتسهل التعليم وليس أكثر..

### جزى الله خيراً كل من ساهم في نصرة كتاب الله

جزاكم الله خيراً كل واحد شارك معنا وكل واحدة شاركت معنا، كل حد اتصل وقال أنا متبرع بنفسي، أنا متبرع إن أنا أتدرّب وأعيش أعلم الطريقة دي، أمنا الفاضلة اللي قالت أنا عندي حاجة وستين سنة وعاشة لوحدي أنا عايزة الشقة بتاعتي تبقى دار للقرآن وأنا أفرح وبس والحافظين والحافظات داخلين وخارجين منها، اللي اتبرعوا بأراضي، جزاهم الله خيراً، اللي اتبرعوا بفيلا أو بفلّل جزاهم الله خيراً، اللي اتبرعوا ببيوت وشقق، جزاهم الله خيراً ، اللي اتبرعوا بأموال، جزاهم الله خيراً، الأخت اللي اتبرعت بعقد الذهب، جزاها الله خيراً، المدرسات اللي اتبرعوا إنهم يتدربوا على الطريقة في كل مكان، جزاهم الله خيراً، الجمعيات اللي زي اللي من بره مصر اللي قالوا إحنا معاكم

وهندعكمم وشوفوا إنتوا عايزين إيه، جزاكم الله خيرًا، اللي اتبرع إنه يبني، أنا بنّا هأعرف أبني، جزاك الله خيرًا، واللي اتبرع أنه ينقش، واللي اتبرع بالدهانات، واللي اتبرع بحملة الدعاية، جزاكم الله خيرًا ، كل واحد ساند ودعم نصره كتاب الله جزاك الله كل خير، اللي هيديك أجرك ربنا سبحانه وتعالى، إخواني في الله " **يَا أَيُّهَا الَّذِينَ آمَنُوا إِنَّ تَنْصُرُوا اللَّهَ يَنْصُرْكُمْ وَيُثَبِّتْ أَقْدَامَكُمْ** " محمد : ٧

إخواني في الله " **إِنَّ تَنْصُرُوا اللَّهَ يَنْصُرْكُمْ وَيُثَبِّتْ أَقْدَامَكُمْ** " محمد : ٧ إحنا عايزين ننصر كتاب ربنا ولو مانصرناش كتاب ربنا يبقى فين النصره، فيه نصره أكبر من إن إحنا ننصر كتاب ربنا، وكلام ربنا ، وننشر دين ربنا، لازم كل واحد منكم يعمل حاجه، لازم كل واحد منكم تعمل حاجه، أنا جاي النهارده أجدد الحملة اللي إحنا بدأناها إمبراح بإذن الله سبحانه وتعالى، لازم نجدد الإعلان ولازم مع بعض نتحمل إن اللي بذل إمبراح بإذن الله سبحانه وتعالى إحنا عايزينك تجيب كمان، اللي اتصل وقال أنا متبرع بفدان من أرضي معاكم، واللي اتصل وقال أنا عندي أراضي كثير خدوا اللي إنتوا عايزينه منها لهذه الحمله، جزاكم الله خيرًا، يا جماعة إحنا عايزين نصر ف كمان وعايزين نفق كمان، وعاوزين نطلع كمان عشان أمتنا تتقدم، عشان القرآن لما يملأ حياة الأمة هو ده النصره الحقيقيه لكتاب الله سبحانه وتعالى.

### القرآن في حياتنا إيه؟

هم حرقوا نسخة في السطور هنعمل لهم مليون نسخة في الصدور بإذن الله سبحانه وتعالى ، هننشر القرآن في الأرض، هنرسل القرآن لكل مكان على وجه الأرض هنطلع حقاظ لكتاب الله يحفظوا كتاب الله، عشان الأمة دي تقوم مرة ثانية عشان الأمه دي ماقامتش غير بإقرأ .. " **اقْرَأْ** " العلق: ١ عشان كده أول كلمة في القرآن كله **اقْرَأْ** .. أول كلمة نزل بيها جبريل اللي هي آخر كلمة هتسمعيها على باب الجنة .. وآخر كلمة هتسمعيها على باب الجنة " **اقْرَأْ وارتق** " صححه الألباني يعني البداية إقرأ هتسمعيها قبل ماتدخلني الجنة كأن كلمة البداية دي كانت كلمة الارتقاء، وكأن إن أول لفظ نزل من القرآن كان كفاية لارتقاء الأمة كلها، كأن ربنا يقول أهه اقرؤوا ده هو ده اللي هيرقيكم هو ده اللي هيزودكم، عشان كده يا إخواني أنا عايز أقول مين اللي هينصر القرآن، القرآن في حياتنا إيه؟ القرآن في حياتنا اقتنعنا بيه .. إيماننا بيه .. وثقتنا فيه، ورد القرآن مين اللي فينا حافظ على ورد القرآن من بعد رمضان لغاية دلوقت؟ مين فينا اللي دموعه سالت في قيام الليل؟ دموعك سالت كام مره من بعد رمضان؟ قرأت قد إيه من بعد رمضان؟ عشت مع آيات إيه من بعد رمضان؟ أكثر آية أثرت فيك إيه من بعد رمضان؟ القرآن يا إخواني، الرسول عليه الصلاة والسلام له أدعية كثيرة وعظيمة وخطيرة.

### اللهم إني عبدك وابن عبدك

ولكن عمري ماشفت تذلل من النبي عليه الصلاة والسلام في دعاء زي دعاء معين، النبي عليه الصلاة والسلام تذلل فيه تذلل يعني سبحان الله، الرسول عليه الصلاة والسلام يقول لربنا " **اللهم إني عبدك، وابن عبدك، وابن أمتك** تخيل واحد.. أنا متخيل كأن واحد بيمرغ راسه في التراب ويقول لحد أنا خدامك " **أنا عبدك، ابن عبدك، ابن أمتك** ده أنا عبد وابن عبد ده أنا عمري ماعرفت غير العبودية ليك، أنا عمري ماعرفت غير العبودية ولا نشأت على حاجة غير العبودية **وابن عبدك** أنا أذل وأفقر الخلق ليك، عايز إيه؟ طيب بتطلب إيه؟ **ناصيتي بيدك ماض في حكمك** أنا

في يدك .. أنا في حكمك .. أنا تحت أمرك، أنا خاضع لأمرك الشرعي وأمرك القدري، أنا بإيدك .. طيب كل ده ليه عاوز إيه؟ **أسألك أسألك إيه؟ " أسألك بكل اسم هو لك "** بكل إسم هو لك يعني ليك إنت لوحذك لا يحق لأحد سواك، يعني إيه؟ طيب عايز إيه؟ كأن واحد يا جماعة .. الواحد بيحس كأن واحد ماسك في أستار الكعبة وقاعد يشتغيث .. والله المثل الأعلى واحد ماسك في هدوم واحد وقاعد يتوسل إليه ويقول له بأتوسل إليك **"أسألك بكل اسم هو لك سميت به نفسك، أو علمته أحداً من خلقك، أو أنزلته في كتابك أو استأثرت به في علم الغيب عندك"** عايز إيه؟ القرآن يارب .. القرآن يارب، أنا عايز القرآن اللي لوجاء هيبقى ربيع قلبي ..

اللي هو ماء المطر اللي بينزل هينبت الزرع تاني اللي هينبت الإيمان في قلبي يارب، يارب القرآن اللي لو دخل صدري هينور صدري يارب .. يارب القرآن اللي لوجاء في حياتي هيحل كل مشاكل حياتي يارب **"أن تجعل القرآن ربيع قلبي"** ماء المطر اللي هينزل ينبت الإيمان في القلب **"ونور صدري"** هينور صدرك بالإيمان **"وذهاب همي وجلاء غمي وذهاب حزني وغمي "** صححه الألباني

القرآن يارب اللي هيضيع كل مشاكل الدنيا والآخرة في حياتي يارب .. حياتي يارب هيبقى بلا مشاكل مع كتاب الله، يا جماعة .. يا إخواني القرآن لو جاء في حياتنا هيعمل إيه؟ الرسول عليه الصلاة والسلام لما يقول القرآن يارب ليه؟ .. ليه؟ .. يا جماعة القرآن ده بيحل كل مشاكل حياتنا .. كل مشاكل حياتنا ..

### لازم المصحف يبقى في إيدك وجوه قلبك

دول مش ستة آلاف وميتين ستة وتلاتين آية، دول ستة آلاف وميتين ستة وتلاتين منجم ذهب بينقذوا الأمة .. يعني طبعاً مع فارق التشبيه يعني .. لأنه كلام الله وصفة من صفات الله .. والله المثل الأعلى، ستة آلاف وميتين ستة وتلاتين كنز ربنا أعطاهم لنا، ستة آلاف وميتين ستة وتلاتين صفقة مع الملك سبحانه وتعالى .. مين اللي هينشر فينا القرآن؟ ومين اللي هينصر فينا القرآن؟ ومين الأول اللي هيقرأ القرآن ويحافظ علي ورد القرآن؟ أنا عاوز كل واحد منكم وكل واحدة منكم وأنا أولكم يشوف هو هيثبت ورد قد إيه كل يوم بإذن الله؟ أو هيثبت قد إيه من القرآن في قيام الليل أو في النهار كل يوم بإذن الله سبحانه وتعالى، ومن أول بعد الحلقة دي يبدأ ورد القرآن، ما يغادرش القرآن، لازم يا جماعة، هما لو بصوا للأمة لقوا المصاحف في أيديها ساعتها هيخافوا لأن المصحف في أيدي وفي قلبي مش هيقدر يعمل فيه حاجة ولكن لما شافوا الأمة اللي في أيدين ده إيه؟ .. واللي في أيدين ده إيه؟ وعينين ده على إيه؟ .. والأمة كلها بتبص لإيه؟ .. ساعتها إلا من رحم الله ..

ساعتها استهانوا بيها .. ساعتها طلّعوا لسانهم لمليار وربعمائة مسلم .. ساعتها يعني أنا قلت لكم لما واحد بصق على علم دولة قامت حرب ما بين الدولتين؛ لأنها مقدسات ورموز، القرآن العظيم يا إخواني يعني آية واحدة بس .. آية واحدة تدخل قلبك تملأ حياتك عشان كده اللي انتكسوا بعد رمضان ليه؟ لو كان آية واحدة دخلت قلوبهم في رمضان كان سبحانه الله العظيم كان عمره ما ساب الطريق أبداً، آية يعني إبراهيم خليل فيليس راعي الكنيسة الإنجليزية في مصر رئيس البروتوستانت كبروا جونج بروتستانتني .. رئيس البروتوستانت في مصر أسلم وعندي كتبه بسبب آية في أول سورة الجن **"قُلْ أُوْحِي إِلَيَّ أَنَّهُ اسْتَمَعَ نَفَرٌ مِّنَ الْجِنِّ فَقَالُوا إِنَّا سَمِعْنَا قُرْآنًا عَجَبًا"** الجن: ١

يا جماعة .. يا جماعة أوروبا ضاعت بسبب عدم فقه آية لما عبد الرحمن الغدق كان يفتح أوروبا لحد ما وصل لفرنسا ومات في معركة بلاط الشهداء.. الجيش كله رجع وساب الفتوحات.. ليه؟ القائد مات لو كان عندنا تربية على قول الله **"وما محمد إلا رسول قد خلت من قبله الرسل أفين مات أو قتل إنقلبتم"** آل عمران: ١٤٤

ماكانش ده حصل في نفس التوقيت أو قريب منه كان محمد الفاتح يفتح أوروبا من الناحية الثانية يعني قريب من هذا التوقيت يعني ووصل لحد روما ومات محمد الفاتح، يرجع الجيش ثاني ويترك هذه الفتوحات.. ليه؟ **"وَمَا مُحَمَّدٌ إِلَّا رَسُولٌ قَدْ خَلَتْ مِنْ قَبْلِهِ الرُّسُلُ أَفَإِنْ مَاتَ أَوْ قُتِلَ انْقَلَبْتُمْ عَلَىٰ أَعْقَابِكُمْ"** آل عمران: ١٤٤

آية واحدة.. أوروبا من شرقها وغربها ضاعت علينا بسبب عدم تربية المسلمين على آية.. فلسطين ضاعت بسبب غياب آية لما اليهود دخلوا قرية من القرى وحرقوها ودبحوا فيها واغتصبوا النساء وقتلوا المسلمين.. المسلمين فزعوا، طلوعوا في الإذاعات كلها إلحقونا، دبحونا، حرقونا، عملوا فينا.. كانت النتيجة إن كل القرى الفلسطينية اترعبت، وهربوا وسابوا القرى ومشوا، واليهود دخلوا فلسطين وما لقوش أي مقاومة بسبب غياب فقه قول الله **"وَإِذَا جَاءَهُمْ أَمْرٌ مِنَ الْأَمْنِ أَوْ الْخَوْفِ أَذَاعُوا بِهِ إِذَا جَاءَهُمْ أَمْرٌ مِنَ الْأَمْنِ أَوْ الْخَوْفِ أَذَاعُوا بِهِ يَعْنِي الْمَفْرُوضِ حَاجَةٌ زِي دِي لَا تَدَاعٍ "وَلَوْ رَدُّوهُ إِلَى الرَّسُولِ وَإِلَىٰ أُولِي الْأَمْرِ مِنْهُمْ لَعَلِمَهُ الَّذِينَ يَسْتَنْبِطُونَهُ مِنْهُمْ وَلَوْلَا فَضْلُ اللَّهِ عَلَيْكُمْ وَرَحْمَتُهُ لَاتَّبَعْتُمُ الشَّيْطَانَ إِلَّا قَلِيلًا"** النساء: ٨٣

هنقول لربنا إيه؟

إخواني في الله يعني إحنا لانزال بإذن الله سبحانه وتعالى يعني بنحرض الأمة على نصره القرآن، بنحرض **"وَحَرِّضَ الْمُؤْمِنِينَ"** النساء: ٨٤ يعني إيه حرص؟ الحرص هو الهلاك، يعني هتهلك لو ما قمتش، هتهلك لو ما فقتش، هنقابل ربنا نقول لربنا إيه؟ ربنا هيقول لك في عيشتك وإن عايش ضاعت فلسطين، واغتصبت مسلمات، وحرق المصحف، وشتم النبي عليه الصلاة والسلام، والمنكرات ملت الشوارع، إنت كان ردك إيه؟ بعد ماكتابنا حرق، ورسولنا شتم، وأرضنا احثلت، ونساؤنا اغتصبت، ومقدساتنا انتهكت.. إيه الرد اللي المفروض نرد بيه؟

### حملة نصره القرآن

إخواني في الله لانزال مع حملة نصره القرآن بإذن الله سبحانه وتعالى أنا هترككم دلوقت مع فاصل إن إيه لإن إحنا هنجيب لكم دلوقت ودي هدية ل تير جونز وأمثاله وكل الناس اللي في العالم اللي بيكرهوا القرآن، إحنا جايبين لكم هدية مصاحف في الصدور لأطفال صغنين خالص حفظوا القرآن بطريقة نور البيان اللي إحنا بندعوا لنشرها في الدنيا كلها بإذن الله سبحانه وتعالى، وهنشوف دلوقت طفل أربع سنين ونصف أو خمس سنين أو طفلة عشر سنين دي حافظة ودي بتقرا من القرآن من أوله وآخره وبالتجويد وبالاحكام كلام إحنا مانعرفش نعمله ..

أنا ما اعرفش إني أنا أتكلم بهذه الطريقة اللي إنتم هتشوفوها دلوقت بإذن الله سبحانه وتعالى، يعني إذا كنتم حرقتم المصحف يا أيها الكفار.. احرقوا بقى المصحف من هذه الصدور.. تعالوا شوفوا بقى هتعملوا إيه لهذه الأبطال اللي إنتم حرقتوا نسخة من المصحف ولكن هنحرق قلبكم بيهم.. وإن شاء الله أطفال أمة محمد كلها هبيقوا نسخ

من هؤلاء بإذن الله، لما نقوم ونشتغل وكل واحد منّا لازم يعمل حاجة ويبقى له دور بإذن الله في هذه الحمله نترككم في فاصل قصير إن شاء الله من أجل ترتيب المكان من أجل مجيء هؤلاء الأبطال بإذن الله وجزاكم الله خيراً يارب

السلام عليكم ورحمة الله وبركاته . الحمد لله وكفى وصلاةً وسلاماً على عباده الذين اصطفى ثم أما بعد..

### الأبطال الصغار حفظة كتاب الله

إخواني في الله، يعني أنا المرّة دي بقى مش أنا اللي هقدّم البرنامج، لأ إحنا معانا أبطال صغار وبفضل الله يعني ممكن اللي برّه كان نفسنا إنه يبقوا موجودين لكن المساحة يعني إيه علشان الكاميرا بفضل الله ووراهم خمسة آلاف طفل وطفلة بيحفظوا القرآن بفضل ومنة الله سبحانه وتعالى، في قرية واحدة، في مكان واحد! ما بنتكلمش على أربعة آلاف قرية بتوع مصر، إحنا لسه بنتكلم عن قرية واحدة.

معانا فضيلة الشيخ عصام يوسف جزاه الله خيراً اللي ربنا نفع بيه في أمريكا وفي الحرمين الشريفين وفي قرية "عرب الرّمّل" اللي أصبحت دلوقت "عرب القرآن" بفضل الله، وفي حفظ آلاف الأطفال للقرآن بفضل ومنة الله في عرب القرآن وفي غيرها بفضل ومنة الله سبحانه وتعالى.

يعني إحنا بنطلب من كل واحد عايز يحرق المصحف إن هو يرد على هؤلاء، ويا جماعة ما فيش كتاب على وجه الأرض، على وجه الأرض كلها محفوظ وحد حافظه زي ما هؤلاء الأطفال حافظين كتاب ربنا، أعظم علماء الطب اللي في الدنيا كلها مش حافظين مراجع الطب زي ما دول حافظين كتاب ربنا، أعظم علماء الكيمياء على وجه الأرض مش حافظين مراجع الكيمياء زي ما دول حافظين كتاب ربنا، أعظم علماء في أي علم في الدنيا مش حافظين كتب هذا العلم، ولا أعظم ولا أكبر قساوسة ولا أكبر أحبار ورهبان في التوراة والإنجيل حافظين التوراة والإنجيل زي ما هؤلاء الأطفال حافظين كتاب ربنا بالحرف، عشان كده يا إخواني إحنا بنقدّم لكم ثمرة طريقة حفظ القرآن بإذن الله سبحانه وتعالى وثمره نشر تحفيظات القرآن بأي طريقة كانت في كل مكان في الدنيا، علشان كلكم تبقوا عايزين ولادكم يبقوا كده بإذن الله سبحانه وتعالى، الكل يدعو إن أطفال المسلمين يبقوا كده .

يعني معانا فضيلة الشيخ عصام يوسف، ربنا يبارك في حضرتك وينفع بحضرتك يا رب.

الشيخ المحفظ: ربنا يجعلنا خيراً ممّا تظنون.

الشيخ حازم: كم طفل بيحفظ مع حضرتك القرآن؟

الشيخ المحفظ: بفضل الله عزّوجلّ ومَنه وكرمه يعني فيه خمسة آلاف طفل .

الشيخ حازم: خمسة آلاف في كل مكان ولا في القرية؟

الشيخ المحفظ: لا، في قرية عرب القرآن و"قويسنا"، مدينة "قويسنا" التي تتبعها .

الشيخ حازم: في مدينة "قويسنا" خمسة آلاف طفل بفضل ومنة الله!

الشيخ المحفظ: في عرب القرآن لأن ليس لنا فروع في أي مكان، لكننا نشرف على كل دور القرآن في العالم

الإسلامي بفضل الله عزّ وجلّ.

الشيخ حازم: ما شاء الله، جزاكم الله خيرًا.

الشيخ المحفّظ: بفضل الله عزّ وجلّ.

الشيخ حازم: يعني عند حضرتك حُفَاط لكتاب الله، أصغر حافظ وحافضة لكتاب الله كم سنة؟

الشيخ المحفّظ: يعني عندي سنتين ونصّ "بسملة" بتحفظ من البقرة

الشيخ حازم: طيب اللي ختموا؟

الشيخ المحفّظ: اللي ختموا القرآن عندنا ١٠٠٠ حافظ للقران الكريم.

الشيخ حازم: أصغر حدّ فيهم كم سنة؟

الشيخ المحفّظ: فيه ثمان سنوات بفضل الله.

الشيخ حازم: ثمان سنوات، ما شاء الله ولا قوّة إلا بالله، طيب ربّنا يبارك في حضرتك ..

الشيخ المحفّظ: عندنا بفضل الله عزّ وجلّ إن أطفالنا يختمون القرآن، وهم أبناء خمس سنين أو أربع سنوات

ونصف، كما نرى في أطفالنا الذين كانوا معنا ونريد أن نستضيفهم مرّة أخرى، خمس سنوات ختموا القرآن بالتجويد

والأحكام والتلاوة، وعشر سنوات، الآن معنا ثلاثة أطفال عشر سنوات ختموا القرآن حفظًا، وهذا هو البرنامج..

الشيخ حازم: ماشاء الله، عشر سنين؟ الله أكبر!!

الشيخ المحفّظ: أه، عشر سنين، يعني أي طفل يدخل معنا دار القرآن بفضل الله يعني من عشر سنين إلى إثني

عشر عامًا يختم القرآن .

الشيخ حازم: وهو عنده عشر سنين أو اثنا عشرة سنة .

الشيخ المحفّظ: أو اثنا عشرة سنة قبل دخول المرحلة الإعداديّة .

الشيخ حازم : وأبوه وأمه يلبسوا تاج الكرامة! هنعمل إيه بقى مع هؤلاء الأبطال الصّغار؟

الشيخ المحفّظ: يعني أنا أدعو كل المسلمين إلى أن يندروا أولادهم لله وأن يعاهدوا الله أن يربّوا أبناءهم على

القرآن وأن يترّبوا هم على القرآن، والطريقة سهلة بسيطة، طريقة نور البيان أو طريقة الرّبانية أو كما قلت فضيلتك

أي طريقة توصل إلى تعلّم القرآن الكريم بأسهل وأيسر أسلوب، ابنك يختم القرآن في ثلاث شهور بالتجويد

والأحكام، إنت وكل المسلمين لنا برنامج في شهرين، والأميين كذلك في ستة شهور حتى غير الناطقين

قال الشيخ حازم: ماشاء الله

الشيخ المحفّظ: من غير المسلمين، أو المسلمين غير الناطقين باللّغة العربيّة

قال الشيخ حازم: ماشاء الله،

الشيخ المحفّظ: أما أولادنا في دار القرآن فيختمون القرآن في سنة ونص .

الشيخ حازم: عايزين نشوف الثمرة بقى يا شيخ عصام .

الشيخ المحفّظ: طيب، مع برنامج جميل مع مقدّمة البرنامج

الشيخ حازم: حبيبة قلبي .. الطّفلة .. الطّفلة مين؟ مريم، اتفضّلي يا مريم إنت ومي وتسليم وهدية، اتفضّلوا.

## صغار لكنهم حقًا كبار

الطفلة مقدّمة البرنامج: أهلاً بكم ومرحبًا مع برنامجكم "أحلام الصّغار" معنا اليوم مجموعة من أصدقاء البرنامج يجمعهم حلم كبير، إنهم صغار لكنهم حقًا كبار، أمّا حلمهم، لبس تاج وحلّة الكرامة، إنها حلّة وتاج أكرم الله بها أهله وخاصّته، أتعلمون من هم؟ إنهم أصحاب القرآن.. عن أبي هريرة عن النبي صلى الله عليه وسلم قال: "يجيء القرآن يوم القيامة فيقول: يا رب حلّه، فيلبس تاج الكرامة ثم يقول: يا رب زدّه، فيلبس حلة الكرامة، ثم يقول: يا رب ارض عنه فيرضى عنه، فيقال له: اقرأ وارق ويزاد بكل آية حسنة." حسنه الألباني

وقد حان موعد سؤال الحلقة المنتظر لتتعلم منه كلنا، أعزائي الأطفال، ماذا فعلتم وقدمتم من أجل تحقيق هذا الحلم؟ إحدى الطفلات تجيب: أمّا أنا، فأعلم أن الله قال: **لَنْ تَنَالُوا الْبِرَّ حَتَّى تُنْفِقُوا مِمَّا تُحِبُّونَ وَمَا تُنْفِقُوا مِنْ شَيْءٍ فَإِنَّ اللَّهَ بِهِ عَلِيمٌ** آل عمران: ٩٢ أنا أحب اللعب جدًّا، فقبل أن ألعب يوميًّا، أخصّص ساعة أحفظ فيها القرآن وأتدارسه وإذا انتهيت من وِردِي قبل انتهاء الساعة، أحضرت كتابًا من كتب التفسير السهلة، ففسّرت آية أو آيتين من كتاب الله ولا أترك هذه الساعة أبدًا منذ خمس سنوات، وإني أرجو الله أن يتقبّل مني ويجعلني من أهل القرآن.

الشيخ المحقّق: بسم الله ما شاء الله.. قولوا بسم الله ما شاء الله

الأطفال: بسم الله ما شاء الله

طفلة ثانية تجيب: أمّا أنا فأعلم أن جبريل كان يعرض القرآن على النبي صلى الله عليه وسلم وكان النبي يعرض القرآن على جبريل، فعزمت على مصاحبة أهل القرآن، فيوميًّا ألتقي أنا وصديقتي في دار القرآن بعد صلاة العصر، أقرأ عليها القرآن وتقرأ عليّ القرآن، وكم تزداد سعادتنا وكم يزداد حبنا يومًا بعد يوم واجتماعنا على القرآن وكلّما افترقنا أوصينا بعضنا البعض بالقرآن والاستمسك به، لأنّه كلام ربنا العزيز الرحيم.

طفلة ثالثة تتحدّث: أمّا أنا فلا أترك القرآن أبدًا، أرتله وأنا في سيري إلى المدرسة، حتى أنني لا أشعر بطول الطّريق ولا بتعبه، بل أشعر أنني وصلت سريعًا، ولا أشبع من كلام الرّحمن ولا من صاحبي القرآن، وإني أدعو الله تعالى أن يجعلني من أهله وخاصّته في زمن الغربة، يوم لا ظلّ إلا ظلّه.

الشيخ حازم والمحقّق: ما شاء الله، بسم الله ما شاء الله.

الطفلة المقدّمة: عزيزي الطفل بعد أن تعلّمت فضل القرآن، ندعوك للاستزادة في علمه والبحث عن كنوزه، ونهدي لك سؤال الحلقة: ماهما السورتان اللتان تُظْلان صاحبهما يوم القيامة، يوم تدنو الشمس من الرؤوس، يشتد الحر ويكشر العرق؟ تجيب باقي الأطفال: سورتا البقرة وآل عمران.

تكمل: عزيزي الطفل، إن البرنامج يفخر بأن في أمة محمد صلى الله عليه وسلم، من هم مثلكم، وكما تعوّدنا في ختام الحلقة، نقدّم هديّة لضيوفنا الأطفال لبلوغ حلمهم.. عبد الله بن مسعود رضي الله عنه ان النبي صلى الله عليه وسلم قال: **"من قرأ حرفًا من القرآن فله حسنة والحسنة بعشر أمثالها لا أقول "الم" حرف ولكن ألف حرف، ولام حرف، وميم حرف"** صححه الألباني ومع أطيب التمنّيات لضيوفنا الأطهار ببلوغ حلمهم.

الشيخ حازم: ماشاء الله.. ما شاء الله

الشيخ المحقق: بسم الله ماشاء الله ثم يقولها الأطفال بعده.

الشيخ حازم: طيب عايزين حد يقرأ في المصحف ربنا يبارك في حضرتك.

الشيخ المحقق: أولادي وأحبابي، يعني أي طفلة تقرأ .

الشيخ حازم: طيب نختر، مين أصغر واحدة فيهم؟

الشيخ المحقق: أصغر واحدة؟ تجيب إحداهن: أنا.. إنت؟ إسمك إيه؟ مها.. عندك كام سنة يا مها؟ أنا لسنة داخله سنة أولى، طيب مها في سنة أولى ..

الشيخ المحقق: لسنة ما دخلتش سنة أولى . الشيخ حازم: لسنة ما دخلتش سنة أولى؟

وتقرأ "لَقَدْ رَضِيَ اللَّهُ عَنِ الْمُؤْمِنِينَ إِذْ يُبَايِعُونَكَ تَحْتَ الشَّجَرَةِ فَعَلِمَ مَا فِي قُلُوبِهِمْ فَأَنْزَلَ السَّكِينَةَ عَلَيْهِمْ وَأَثَابَهُمْ

فَتْحًا قَرِيبًا" الفتح: ١٨ بارك الله فيك، ماشاء الله!

المحقق: "فَتْحًا قَرِيبًا" حكمها إيه يا أولادي؟ تجيب الفتيات بصوت واحد: إخفاء.

المحقق: الدليل، ما الدليل؟ تقرأ الفتيات بصوت واحد :

مِنَ الحُرُوفِ وَاجِبٌ لِلْفَاضِلِ  
رَمَزُهَا فِي كَلِمِ هَذَا الْبَيْتِ قَدْ ضَمَّتْهَا  
ذُمٌ طَيِّبًا زِدْ فِي ثَقَى ضَعُ ظَالِمًا

وَالرَّابِعُ الإِخْفَاءُ عِنْدَ الْفَاضِلِ  
فِي خَمْسَةِ مِنْ بَعْدِ عَشْرٍ  
صِفٌ ذَا ثَنَا كَمْ جَادَ شَخْصٌ قَدْ سَمَا

طيب، تقرأ ابنتنا نسمة، اتفضلتي يا نسمة، افتحي المصحف .

عاهدوا الله على نصره القرآن

وهي البشرية لكم أيها المشاهدون، "لقد رضي الله عن المؤمنين" وأحب أن يعاهد المشاهدون الآن ربهم على أن ينصروا دين ربهم، قولوا عاهدنا الله على نصره القرآن، قولوا جميعاً أيها المشاهدون، عاهدنا الله على نصره القرآن وتعلمه وتعليمه، ونشره في العالمين والله المستعان.. والله على كل شيء قدير، وهو نعم المولى ونعم النصير، هذا عهدنا "لَقَدْ رَضِيَ اللَّهُ عَنِ الْمُؤْمِنِينَ" الآن هي البشرية لكم ..

طفلتى نسمة تفضلتي اقرئي بسم الله.. نفتح المصحف على أي موضع.. نسمة تقرأ: "اللَّهُ نُورُ السَّمَاوَاتِ وَالْأَرْضِ مِثْلُ نُورِهِ كَمِشْكَاةٍ فِيهَا مِصْبَاحٌ ۗ الْمِصْبَاحُ فِي زُجَاجَةٍ ۗ الزُّجَاجَةُ كَأَنَّهَا كَوْكَبٌ دُرِّيٌّ يُوقَدُ " النور: ٣٥ الشيخ يسأل: "دُرِّيٌّ يُوقَدُ" ما حكمها؟ البنات: إدغام بغنة، الشيخ: وما الدليل؟ البنات:

فِي يَرْمَلُونَ عِنْدَهُمْ قَدْ ثَبَّتْ  
فِيهِ بَغْنَةٌ بَيْنَهُمْ عِلْمًا  
تُدْغِمُ كَدُنْيَا ثُمَّ صِنَوَانٍ تَلَا

وَالثَّانِ إِدْغَامٌ بِسِتَّةٍ أَتَتْ  
لِكِنَّهَا قِسْمَانِ قِسْمٌ أَدْغَمَا  
إِلَّا إِذَا كَانَ بِكَلِمَةٍ فَلَا

نسمة تكمل قراءة: " يُوقَدُ مِنْ شَجَرَةٍ مُبَارَكَةٍ زَيْتُونَةٍ لَا شَرْقِيَّةٍ وَلَا غَرْبِيَّةٍ يَكَادُ زَيْتُهَا يُضِيءُ وَلَوْ لَمْ تَمْسَسْهُ نَارٌ نُورٌ عَلَى

نُورٍ يَهْدِي اللَّهُ لِنُورِهِ مَنْ يَشَاءُ وَيَضْرِبُ اللَّهُ الْأَمْثَالَ لِلنَّاسِ وَاللَّهُ بِكُلِّ شَيْءٍ عَلِيمٌ" النور: ٣٥

الشيخ حازم: ما شاء الله .

الشيخ: " بِكُلِّ شَيْءٍ عَلِيمٌ " ما حكمها؟ البنات: الإظهار حلقى.. الشيخ: وما الدليل؟ البنات :

فَالأَوَّلُ الإِظْهَارُ قَبْلَ أَحْرَفِ  
لِلْحَلْقِ سِتِّ رَتَّبَتْ فَتَعْرِفِ  
هَمْزُ فَهَاءٍ ثُمَّ عَيْنٌ حَاءً  
مُهْمَلَتَانِ ثُمَّ غَيْنٌ حَاءً

الشيخ المحفظ: سنهم من خمس إلى ست سنوات .

الشيخ حازم: كم سنة يا مها؟

مها: سبع سنين .

الشيخ المحفظ: أنتِ لم تدخلي المدرسة يا مها يبقى ست سنوات .

الشيخ حازم: هي لا تعرف كم عمرها

الشيخ المحفظ: ست سنوات لم تدخل المدرسة بعد .

الشيخ حازم: ونسمة ست سنوات ما شاء الله .

الشيخ المحفظ: هل تقرئي لنا آية؟

الشيخ حازم: ما زال لدينا طفلة واحدة يا شيخ عصام، فيه واحدة حافظة القرآن كله؟

الشيخ المحفظ: نعم.. مي حافظة القرآن كله .

الشيخ حازم : حافظة القرآن كله يا مي؟ كله؟ عندك كام سنة؟

مي: عشر سنوات

الشيخ حازم: عشر سنوات وحافظة كتاب الله كله! طب عايزين نمتحنها بقي يا شيخ عصام، حضرتك اسألها يا شيخ

الشيخ المحفظ: طيب قولي يا مي " الْحَمْدُ لِلَّهِ الَّذِي أَنْزَلَ عَلَى عَبْدِهِ الْكِتَابَ وَلَمْ يَجْعَلْ لَهُ عِوَجًا ۗ " الكهف: ١

مي: "أعوذ بالله من الشيطان الرجيم بسم الله الرحمن الرحيم

" الْحَمْدُ لِلَّهِ الَّذِي أَنْزَلَ عَلَى عَبْدِهِ الْكِتَابَ وَلَمْ يَجْعَلْ لَهُ عِوَجًا \* قَيِّمًا لِيُنذِرَ بَأْسًا شَدِيدًا مِنْ لَدُنْهُ وَيُبَشِّرَ الْمُؤْمِنِينَ

الَّذِينَ يَعْمَلُونَ الصَّالِحَاتِ أَنَّ لَهُمْ أَجْرًا حَسَنًا \* مَا كُنْتُمْ فِيهِ أَبَدًا" الكهف: ١: ٣

الشيخ المحفظ: يبقى تسنيم اقرئي من " سُبحَانَ الَّذِي أُسْرِيَ

تسنيم: " سُبحَانَ الَّذِي أُسْرِيَ بِعَبْدِهِ لَيْلًا مِنَ الْمَسْجِدِ الْحَرَامِ إِلَى الْمَسْجِدِ الْأَقْصَى الَّذِي بَارَكْنَا حَوْلَهُ " الإسراء: ١

الشيخ المحفظ: بنتنا التي لم تقرأ.. اقرئي سورة الإخلاص

البنات: "قُلْ هُوَ اللَّهُ أَحَدٌ \* اللَّهُ الصَّمَدُ \* لَمْ يَلِدْ وَلَمْ يُولَدْ \* وَلَمْ يَكُنْ لَهُ كُفُوًا أَحَدٌ" الإخلاص: ١: ٤

الشيخ حازم: ربنا يبارك في حضرتك يارب أنا مش قادر أتخيل لو أنا مكانك وهؤلاء هم الثمرة هأبقى فرحان أد إليه؟

ربنا يبارك في حضرتك ويكرمك يارب..

الشيخ المحفظ: ربنا يبارك فيك.

الشيخ حازم: كما عملت لدين الله تعالى وسخرت حياتك لحفظ كتاب الله سبحانه وتعالى ربنا يبارك في حضرتك .

إخواني في الله جزاكم الله خيراً

ونحن الآن نجدد مرة أخرى باذن الله سبحانه وتعالى، نحن نريد ملايين النسخ من هؤلاء الأطفال بإذن الله سبحانه وتعالى، ونريد إذا كانوا هم قد أحرقوا مصحفاً في السطور فسوف نجعل ملايين المصاحف في الصدور بإذن الله سبحانه وتعالى..

### لازم نوصّل المصحف لكل العالم

نريد أن نفعل حملات كثيرة من أجل نشر القرآن في الدنيا كلها ونشر تحفيظ القرآن في الدنيا كلها، وتوصيل المصحف لكل العالم، لكل الناس المسلمين وغير المسلمين بإذن الله سبحانه وتعالى .

بدأنا حملة نصره القرآن ردًا على حرق المصحف بإذن الله وقد قلنا من لديه مدرسة خاصة يتصل ونحن ندخل طريقة حفظ القرآن عنده، من لديه شقة يتبرع بها، من لديه أرض فليفعل كما فعل كل الأغنياء من أصحاب رسول الله صلى الله عليه وسلم إنهم عملوا وقف لله قطعة أرض ، بيت ، شقة لأجل أن يصبح دار قرآن بإذن الله. أي دولة خارج مصر محتاجة حد يروح يدرب اللي فيها على طريقة نور البيان موجود بإذن الله .

أي واحدة أو واحد هيجيب ثلاثين دارس أو دارسة في أي بلد ثلاثين على الأقل يعني إن شاء الله يعني هندربهم بإذن الله بلا أجر طبعًا بدون أي مقابل طبعًا، لأن هذا كله بدون مقابل إن شاء الله .

هندربهم حتى يصبحوا منارة في البلد بتاعتهم إن شاء الله، أي حد عايز يفتح طريقة، عايز يفتح دار حفظ قرآن في بلده ومحتاج إن إحنا نعرفه، يفتح إزاي ويفرش المكان إزاي ويدرب اللي فيه إزاي، إن شاء الله بإذن الله إحنا معاه بإذن الله سبحانه وتعالى .

وماحدث يقول أنا في القرية بتاعتي فيه دار، فيه قرية واحدة فيها خمسة وأربعين دار ولا تزال تستحمل أكثر وتتسع أكثر إن شاء الله .

نريد أن ننشر هذه الطريقة في كل بلد، وفي كل شارع، وفي كل قرية، وفي كل مركز بإذن الله سبحانه وتعالى .

أي حد لا يتكلم العربية في أي دولة أخرى ويريد أن يتعلم وأن يقرأ القرآن كما أنزل إن شاء الله تعالى كل هذا موجود .. نريد أن نحفظ أولادنا القرآن، نريد أن نحفظ نحن أيضًا القرآن إن شاء الله بإذن الله .

يعني من يريد أن يعرف أقرب دار قرآن له بحيث أن يذهب ليحفظ فيها، أو تذهب لتحفظ فيها من الكبار يتصل إن شاء الله بإذن الله .

وإن شاء الله بإذن الله ربنا ينصر دينه ويعز أوليائه ويأذن لكتابه أن يسود .

ورسالتنا في الحياة أن تكون كلمة الله هي العليا فوق كل كلمة، وفوق كل شرع، وفوق كل حكم، وفوق كل دين .

الأرقام مرة أخرى التي يمكن الاتصال عليها إن شاء الله للتواصل مع حملة اقرأ وارتقى

" ٠١١٦٢٧٧٧٦٢ " " ٠١١٦٢٨٨٨٦٢ " " ٠١١٦٢٩٩٩٦٢ "

ورقم التبرع لجمعية رسمية لمن يريد أن يتبرع بالمال مباشرة مكتوب عنكم إن شاء الله بنك مصر حساب رقم

٢٠٨/١/١١٥٠٨٧ إن شاء الله بإذن الله .

ربنا يشيتمكم إخواني وربنا ينصر بنا دينه.. الحملة موجودة الآن على النت ومنتشرة في الإنترنت من خلال موقع

**way2allah** أو الطريق إلى الله بإذن الله، وموقع أهل الله الخاص بالطريقة النورانية، وموقع نور الله بإذن الله قريباً

يعنى على موقع الطريق إلى الله

ندعي معاً يا شيخ عصام ونرفع أكفنا.. اللهم انصر دينك وأعز أوليائك، اللهم استعملنا ولا تستبدلنا، اللهم

استخدمنا لنصرة دينك في الأرض، اللهم استخدمنا لنصرة القرآن في الأرض، اللهم ارزقنا حفظ القرآن في صدورنا

يارب العالمين، رب اجعلنا لك صوّامين لك قوّامين لك ذكّارين لك شكّارين، برحمتك يا أرحم الراحمين..

أقول قولي هذا وأستغفر الله لي ولكم، سبحانك اللهم وبحمدك نشهد أن لا إله إلا أنت أستغفرك وأتوب إليك..

وجزاكم الله خيراً

تم بحمد الله

شاهدوا الدرس للنشر على النت في قسم تفرغ الدروس تفضلوا هنا:

<http://forums.way2allah.com/forumdisplay.php?f=36>